

ALAHADY 1 - FIAVIAN'NY TOMPO -B- 2023



« Mitandrema, miambena, ary mivavaha, fa tsy fantatrareo izay hiavian'ny fotoana » (Mk. 13: 33)

Ry Kristianina havana, tamin'ny Alahady lasa teo no nankalazantsika tamin'ny fomba manetriketrika an'i Kristy Mpanjakan'izao rehetra izao, Mpanjaka tokoa i Kristy fa tsy araky ny hevitr'izao tontolo izao satria ny mpanjakan'izao tontolo izao dia mpanjaka mitady voninahitra, mirehareha, mamoritra aza rehefa tsy mitovy hevitra aminy. I Jesoa kosa Mpanjaka mikolokolo, manompo, manasoana antsika sy mitondra antsika amin'ny fiainana maha-zanak'Andriamanitra hahitana fivelarana marina. Izy izay Mpiandry ondry tsara mahafoy ny ainy ho an'ny ondriny ary dia izany no modely ho an'ny mpanjaka rehetra sy ny mpitondra rehetra na ara-nofo na ara-panahy, ho an'izay manana andraikitra rehetra. Nifampiarahaba isika tamin'ny fankalazana an'i Kristy Mpanjaka satria famaranana ny taona litorjika izany.

Vakiteny I : Iz. 63, 16b-17, 19b; 64, 2b-7
Tononkira : Sal. 26,
Vakiteny II : 1 Kôr. 1, 3-9
Evanjely : Mk. 13, 33-37

Miavaka ity taona litorjika hatombotsika ity satria ankoatry ny firosoantsika hatrany miara-dia, miara-dalana amin'ny Sinaody Fijanonana faha-3, Fianakaviana Eglizy kely mifampitsimbina, mifanasoa mikatsaka ny soa iombonana dia taona iainana koa ny ny Kongresy Eokaristika izay hanehoantsika ny fototra sy loharanon'ny maha kristianina

mpiara-belona amin'ny olona dia ny Eokarisitia. Taona Masina ho antsika tokoa ity taona litorjika vaovao ity, ity taom-pikatrohana vaovao ity. Hikatroka tokoa isika ka hiroso hatrany hanorina indray ny Tranobe lombonana efa robaka dia ny tontolo iainana, ny tontolom-piainana ary ny tontolom-pinoana. Tanteraka ny nofinofintsika dia ny mba hahatonga antsika tokoa ho Génération Mpanorina izany hoe ho EGLIZY VELONA VELOMIN'NY BATEMY MIOMBONA MIARA-DALANA MANDRAY AN-TANANA IRAHINA HO MISIONERA TABERNAKLA VELONA...

Raha manao famerenana kely isika ary manohy izany rehetra izany, ny atao hoe “Avent, na fiaviana” dia tsara ny mamaritra amin’ny fomba tsotra fa misy fiaviana telo. Tadidintsika tsara fa ny fankalazana ho antsika dia sady fahatsiarovana no mahatonga antsika koa mivelona an’izany fankalazana izany noho ny asan’ny Fanahy Masina. Mankalaza ny fiaviana isika manomboka izao androany Alahady voalohany amin’ny fiaviana izao ka hamakivakiansika herinandro 4 ny vanimpotoanan’ny fiaviana izay mitondra antsika amin’ny Noely. Matoa isika entanin’ny Eglizy mankalaza an’izany dia ny mba hibanjinantsika ny fiaviana telo ary indrindra hivelomantsika. Raha ampiharina amin’izao iainantsika dia ny Fijanonana faha-3 ho an’ny fiarahan-dalana amin’ny Sinaody ary ny firosoana amin’ny Kongresy Eokaristika:

Ny fiaviana voalohany izay nandrasan’ny vahoakan’Andriamanitra, niandrandra ny vahoaka tamin’izany ka tanteraka tamin’ny fahaterahana sy ny fahatongavan’i Jesoa ho nofo izany fiaviana izany izay fahasoavana ho an’izay nahay nandray azy. Anisan’izany i Masina Maria, i Md Josefa, ireo mpiandry ondry ary ireo vahoaka madinika. Nisy koa ireo tahaka an’i Heroda izay tsy nanokatra ny fony ka tsy nandray an’i Jesoa Kristy mpanjaka.

Fampianarana ho antsika ireo ohatra velona ireo indrindra fa ireo izay niandry, niambina ary nanaiky nandray an’i Jesoa, anisan’izany koa i Joany Batista, i Simeona ary Ana ary ny mpaminany nanomana ny vahoaka hahay handray an’i Jesoa. Izany ny fiaviana voalohany ankalazaintsika sady hiainantsika vokatry asan’ny Fanahy Masina. Haka tahaka an’i Masina Maria isika hiandrandra ny fiavian’ny Tompo ka hahay hanao “Eny” tahaka azy. Haka tahaka an’i Md Josefa ilay lehilahy marina handray an’i Jesoa eo amin’ny fiainantsika ka hahatonga antsika hamokatra eo amin’ny fiainantsika, Tahaka an’i Joany Batista izay mpaminany nijoro ho vavolombelona satria mila vavolombelona koa ny fiainantsika. Haka tahaka ny fahatsoran’ireo mpiandry ondry ka niara-nidera niaraka tamin’ireo anjely. Haka tahaka an’ireo majy manam-pahaizana nefa nahalala sy nanaiky fa i Jesoa no tena fahendrena indrindra. Izany no mitondra amin’ny fiainana marina

Ny fiaviana faharoa dia izao iainantsika izao amin’ny alalan’ny Sakramenta sady efa nanaovantsika toro-làlana hahatonga antsika ho Kristy Mpiara-belona amin’ny olona satria i Jesoa eo anivontsika ka isika no mitondra Azy eo amin’ny manodidina antsika. Raha atao teny hafa ny tanjona dia ny hahatonga antsika hanavao ny fifandraisana na amin’ny tontolo iainana na amin’ny tontolom-piainana na amin’ny tontolom-pinoana. Matoa tonga nofo ny Zanak’Andriamanitra dia hanavao ny zava-drehetra ka maniraka antsika hanorina indray ny Fianakaviam-ben’Andriamanitra Olo Araiky Isika Jiaby ao anatin’ny fihavanana sady kristianina no malagasy. Tanteraka ny teny fanevan’ny Kongresy : “FIHAVANANA NO HANASITRANA AN'IZAO TONTOLO IZAO MPIRAY TAMPO ISIKA JIABY” dia hitoetra ao amin’i Kristy isika ary i Kristy hitoetra ao amintsika. Amin’izay dia afaka hifampitsimbina sy hifanasoa isika jiaby, hikatsaka ny soa iombonana mba hamokatra ny fiainantsika , ho “Génération mpanorina” sy mpampijoro ary mpanatsara sy mpikolokolo fa tsy mpamotika na mpandrava.

Ny fiaviana fahatelo dia iandrasantsika amin’ny fomba manetriketrika ny fiverenan’i Jesoa amin’ny voninahiny. Mampatahotra ny olona izany, mampavozo ny maro fa isika kosa noho asan’ny Fanahy

Masina dia mivelona an'izany ka miandry am-paharetana sy feno fanantenana. Eo amin'ny Eokaristia indrindra no hivelomana io fiaviana fahatelo.

Tsy io ihany fa ny fiaviana telo no ankalazaina amin'ny Eokaristia. Izany indrindra no mahasarobidy ny Kongresy iainantsika azy ireo.

Ny Tenin'Andriamamnitra aroson'ny Eglizy antsika androany dia efa mampisokatra ny fontsika. Izaia mpaminany ao amin'ny vakiteny voalohany dia milaza *“tongava, sokafy ny lanitra, izay lazaintsika hoe fiadanana, midina ianao, mandrovita ny lanitra dia midina tongava eo aminay”*.

Izany no andrandraintsika ka enga anie hosokafan'Andriamanitra tokoa ny fo amam-panahintsika. Hidina izy handondona amintsika ka anjarantsika ny manolotra ny fontsika.

Ry Kristianina havana raha sokafantsika ny fontsika ka miditra ny Tompo ary mahazo ny fiadanana miaraka Aminy isika dia izay ny fisokafan'ny lanitra izay niainantsika ary mba antenaintsika iainana bebe kokoa amin'izao Sinaody izao, Eglizy miara-dia isika miroso amin'ny fihaonana amin'I Jesoa tonga eto anivontsika. Io indrindra no tanterahantsika amin'ny Kongresy eokaristika rehefa manao prosesiô isika.

Sokafy àry ny fontsika ka atolory ny hafa, ampidiro eo amin'ny fontsika i Jesoa nefa aza hidiana na tehirizina ho anao irery fa ento eo amin'ny manodidina antsika mba hanadio ny fiainantsika miaraka amin'i Jesoa isika. Mba hahafantarantsika fa miombona amin'Andriamanitra tokoa isika dia izao fotoan'ny fiaviana izao no hanadiovantsika ny fiainantsika izany hoe hialantsika amin'ny fitondran-tena tsy mendrika an'Andriamanitra. Aoka ho fiainana misy an'Andriamanitra ny fiainantsika fa indrindra ny fianakaviana, eglizy kely, izay loharanon'ny fahasoavana rehetra amin'ny fiainantsika. Ny fiarahantsika mivavaka anatin'ny fianakaviana no ametrahantsika toerana bebe kokoa Andriamanitra.

Antintraterin'i Md Paoly koa izany ao amin'ny vakiteny faharoa, taratasy ho an'ny Korintiana, miantefa amintsika ny hafatra napetrany. Aoka ho vonona isika amin'ny fisehoan'i Jesoa, raha manana fiainana miombona amin'i Jesoa isika dia manan-karena *“Isaorako an'Andriamanitra mandrakariva ny aminareo, noho ny fahasoavan'Andriamanitra nomena anareo ao amin'i Jesoa Kristy: fa noho ny firaisanareo aminy, tonga manan-karena amin'ny zavatra rehetra ianareo, dia amin'ny teny rehetra sy amin'ny fahalalana rehetra; ary noho ny niorenan'ny Evanjelin'i Kristy eo aminareo, dia tsy ho latsa-danja noho ny hafa ianareo amin'ny fahasoavana rehetra, hany ka miandry amim-pitokiana ny fisehoan'i Jesoa Kristy Tompontsika”*.

Manana an'i Kristy isika ka zary Kristy koa isika hany ka mamokatra an'i Kristy eo amin'ny fiainantsika. Miombona Aminy isika, izany no kominio. Aza hidiana ao am-pontsika i Kristy fa ento eo amin'ny mpiara-belona mba hamokatra. Hiorina amin'izany harena marina izany isika fa tsy sanatria harena diso. Mba tsy ho harena piraty no iainantsika izany hoe harena mitondra antsika hifampialona, hikorontana sy hitondra antsika amin'ny ady isan-karazany. Ny harena tena izy dia mampiombona fa tsy manavakavaka. Harena ny harena raha mamokatra ary mamokatra ho an'ny

besinimaro. Koa sokafy ny fontsika ho an'ny hafa, izao vanim-potoanan'ny Fiaviana izao no fotoana tsara.

Izany no dikan'ny hoe “ miambena ” ampianarin'i Jesoa ao amin'ny Evanjely. Miambina isika raha misokatra ny fontsika ka mahita an'izay hafatr'Andriamanitra izay eo amin'ny fiainantsika andavanandro tahaka ny nataon'i Masina Maria, ny nataon'i Md Josefa sy ireo mpiandry ondry ary ny majy. Mihidy ny fontsika raha manao tahaka an'i Heroda satria mitodika amin'ny tenantsika ary izay no tsy hahitantsika ny fiadanana eo amin'ny fiainantsika.

Sokafy ny sofintsika handre ny hafatr'Andriamanitra dia ny Teniny izay torina amintsika fa indrindra amin'izao Fiaviana izao. Mitoetra ao amin'i Jesoa isika raha mihaino ny teniny sy manatanteraka ny hafany ka manokatra ny sofintsika mba handre ny antso sy kiakan'ireo manodidina antsika. Fantantsika fa mila famonjena izao androntsika izao ka ny tena famonjena dia ny fanolorantsika an'i Jesoa izay tena harena tokoa amin'ireo manodidina antsika.

Sokafy koa ny vavantsika hanambara ny hafalian'ny Vaovao Mahafaly, izany no atao hoe miambina. Mivavaha isika ary mitoria ny hafalian'ny Vaovao Mahafaly amin'ny alalan'ny vavantsika.

Izany ny fiaviana homanintsika ry Kristianina havana ka miambena ary mivavaha fa izao no andro sarobidy, mialà amin'ny fitondran-tena tsy mendrika an'Andriamanitra, sokafy ny fontsika hahay handray an'i Jesoa. Izy no harena ka mitoera ao Aminy isika dia hamokatra be. Raha mamokatra isika dia hiadam-pinaritra ao Aminy.

Ry Jesoa Kristy Tompo ô nampianarinao izahay mba hahay handray Anao, hiambina amin'ny fiavianao. Aoka anie hanana finoana sy fanantenana ary fitiavana izahay ka hanatanteraka ny fiomanana hahay handray Anao. Asainao miambina tokoa izahay mba ho vonona hitsena Anao amin'ny hiavianao eo amin'ny andro iainanay ka hahazoanay ny tena harena dia lanao ka hamokatra ny fiainanay. Enga anie izahay hanana fahasahiana ka hanilika ireo vato misakana rehetra tsy hahaizanay mandray Anao. Enga anie izahay hiala amin'ny harena mandrendrika anay sy ny fiarahamoninay ary ny fianakavianay. Enga anie izahay mba ho fahazavana ho an'ny hafa ka hitarika azy ireo hiomana koa handray Anao. Amin'izay dia handresy ny ratsy izahay ka hamokatra araky ny sitrakao. Mitodika aminao izahay ry Maria Reny, raha nisy nahay nandray an'I Jesoa dia ianao. Ampianaro izahay hahay hanao “eny” amin'ny sitrapon'Andriamanitra ka hitoetra amin'I Jesoa. Md Josefa, ento am-bavaka ny ezaka ataon'ny fianakaviana mba ho “eglizy kely” tokoa. Amen

Mompera Arseveka Mgr Benjamin Ramaroson